

Tesalonaika Tovetumagana Yadi Leta Nagona Paulo Givetokilumina

Kivemala

Tesalonaika ani melala kuyakuya taliyeya, Masedoniya anafafali wagaine. Paulo yana laumamala balawalilivuga anavelu wagaine ginau wadedeku ke valey a iwakana gimadu lumamalena e ada ekalesiya-nai givevuvu (Gugai 17:1-14). Tovetumagana evagudiyavo ani tufodi meIsileli aku tufona moyaidi ani badi keke meIsileli. Aku meIsileli-dina idamana Yeisu anavetumagana wagaine faina, aditoveimeyayavo iagouga-mowa e ada Paulo yana yoo nodi iwavidi ke inau melala Beliya. Aku muliya Paulo Timoti giimilina Tesalonaika ke adivaleya iwakana gialiyena.

Leta taidei wagaine Paulo givona vesiule meTesalonaika wagaidiya, faina vita tulina tulina wagaidiya yadi vetumagana wagaine imididi toyo-gina, ada kaduwe Paulo inuwaududuna faina. Nuwanuwana aseasedi gina kivevatudi ada yadi toolidadana ani Yeisu aimo keke gida yewaela aku badi tovetumagana imadualika ani gilufata.

Vesiule. (1:1)

MeTesalonaika yadi vetumagana faina ivona vesiule. (1:2-10)

Paulo yana gugai Tesalonaika wagaine. (2:1-16)

Paulo nuwanuwana meTesalonaika gina maduboda-vagiledi. (2:17 - 3:5)

MeTesalonaika valeyadi Paulo ginogalina ada givemwamwala. (3:6-13)

Dewa iwakana wagaine Yaubada kana kivemwamwalina. (4:1-12)

Yeisu yana yewa-vagila faina. (4:13 - 5:11)

Paulo yana vagadona anaebalauyabu ke von-avetalakafoi. (5:12-28)

¹ Ime Paulo, Sailasi ke Timoti. Imiyavo Yaubada yana yoo wamiyamiya yana ekalesiya Tesalonaika wagaine ani yama vesiule wagaimiya, imi Yaubada Tamada kaduwe yada Kauveya Yeisu Keliso nodi waveseyana. Adiselu wa yadi nuwadoga ina lemelememi ada kaduwe aseasemi ina kikiveniwalovina.

MeTesalonaika yadi vetumagana faina ivona vesiule.

² Keke gavana faina aku tova moyaina avesive-siule Yaubada wagaine moyaimi faimiya, ada kaduwe yama veoveola wagaine amiyegana ainainanadi.

³ Tova ke tova Yaubada Tamada matane yami vetumagana wa anagugai anuwanuwayedi, kaduwe Banae wanuwakabubuyena faina yana gugai wagaine wavedivediwe, ada yami vetumagana wasevelavelaina yada Kauveya Yeisu Keliso wagaine.

⁴ Tubuiyameyavo, Yaubada ginuwak-abubuyemi. Ada aalamanena vaita givenuwadadanemi Banae yana kalivayavo,

5 faina tova-nai Yeisu anavaleya iwakana aaliyena wagaimiya ani Aluwaluwa Tabuna give-tutamwaina, e ada ina keke vona gagana wagaïne aku kaduwe gugai ebameyasidobodobo gigugaiyena,[†] e ada wavonaga, “Valeya-nai ani vona velemonoena.” Tova-nai ime ineneku imi nodi amimwatuguya amiyamiya, imi waalamana gavaïyamu adewadewa ina yami ebaita ke amilema faina.

6 E ada imiyavo ani ime wagaveuveulema[†] kaduwe yada Kauveya wagaveuveulena. Tau-miyavo waawaegemi valeya-nai iwakana wagaïne ada vita tulina tulina wanuwagadi badi kaliva-dina Keliso iagougena ani wagaidiya-deya. Uloulolo moyaina wanuwagadi[†] aku Aluwaluwa Tabuna yana vemwamwala wagaine imi wavemwamwala.[†]

7 Ada idamamauwe wadewa faina, tovetumagana moyaidi imiyamiya Masedoniya ke Akaiya yami vemwamwala iitana ke yami vetoefaefa, ada ida yadi ebaita e ada ina gaveuveulemi.

8 Imiyavo wagaimiya-deya Yeisu valeyana giyegemo ginau yami fafali Masedoniya ke Akaiya anakalivayavo wagaidiya. Ada keke yami fafali gagana, aku kaduwe yami vetumagana Yaubada wagaine valeyami gimutula ginau mali kaliva fafali moyaidi atuwadeya ani ikaiyanogala yami vetumagana Yaubada wagaine faina. E ada keke tamo valeya ana vetutamwai.

9 Faina mali fafali anakalivayavo ani taudiyavo iawatalatalaina gavaïyamu tuwaina yama maduboda wagaimiya, ada gavaïyamu wa yami ase-

[†] 1:5 1Kol 4:20 [†] 1:6 2Tes 3:7,9 [†] 1:6 Gug 17:5 [†] 1:6 Mad 5:12

waega wasivaivaima, kadu gavaiyamu tuwaina waawaegemi yaubada fwayafwaya wagaidiya aku Yaubada Banae velemonoena kadu wayawaina ani wamiyavilami wagaine ke wavetogugai faine.

¹⁰ Kaduwe badi kaliva-dina iifuifufuyena gavaiyamu wabodaboda Natuna yana yewa-vagila gabameya-deya faina,[†] Banae Yaubada gisiveyawa-vagilena alikeya.[†] Tainei Natuna-nai Yeisu, Banae Yaubada yana nuwakoyo lakaina ke yana matavuloga aimo ina yegemona ani gikibababaleda wagaidiya-deya.[†]

2

Paulo yana gugai Tesalonaika wagaine.

¹ Tubuiyameyavo, imi taumiyavo waalamanena yama maduboda wagaimiya ani wa guwana, faina leme wanuwagana.

² Waalamanena muliya-yo aelai wagaimiya, melala Filipai wagaine badi gavega Keliso iagougena ani ikiveuloulolonima lakaina ke iawavekoyoyema.[†] Ada ime wa yama uloulolo nodi nonogana Yaubada gikiveasevatuma ke yana valeya iwakana aifufuyena wagaimiya.[†] Aku badi togadibudibusoyoga yami melala wagaine ani, Yaubada yana lemeya keke ada matausedi ke yama gugai ada ilova.

³ Faina yama lauwage wagaimiya vuvuna ani keke nuwanuwa balana o kai nuwanuwa itaitaluvadigadi faidiya, kaduwe ime keke

[†] **1:10** Gug 1:11 [†] **1:10** Gug 2:24 [†] **1:10** Mad 3:7, Lom 5:9, 1Tes 5:9 [†] **2:2** Gug 16:19-24 [†] **2:2** Gug 17:1-9

nuwanuwa velemonoena aditoikavuya vaita ana fwayanegenegemi, keke-mowa.

⁴ Aku aiyada ime Yaubada giawaveiwakanema e ada wa yana vetumagana yana valeya iwakana gisena nimameya ke ana awaawatalatalainena. Ina yama ifufu vuvuna. Ada keke kaliva ana kivemwamwalidi faina, aku Yaubada ana kivemwamwalina,[†] Banae aseaseda giitauluuluvidi ke yada nuwanuwa gialamanedi kai iwakana o kai koyona.[†]

⁵ Imi waalamanena ime keke tamo tova nuwami ada kanikani awadavadava fwayafwaya wagaine, kaduwe keke tamo tova yami giba ada luvadigedi ke awavedivedigaga wagaine ada sewavuye, keke-mowa. Yaubada amatoitavedama.

⁶ Ada keke amayegana anakilakata ada lelele,[†] keke imi wagaimiya o kai mali kaliva wagaidiya-deya.

⁷ Imeyavo Keliso yana afositoloyavo e ada gavana amaitaveyabina faina ada veola wagaimiya, aga ina amalauboda. Aku keke amafai-weya vita ana velemini, aku anafaiweya vavine seyadi natudiyavo biyabiyamidi ivetavetaumidi ke iitaitaveyabidi, mamauwe yama dewa bikana amimwatugu wagaine.

⁸ E ada yama nuwanuwa wagaimiya asena faina, aawaegema ke wa yama vemwamwala lakaina Yaubada anavaleya iwakana aavetave-tala imi wagaimiya. Ada keke valeyana-nai gagana aku kaduwe taumeyavo aawaegema wagaimiya, faina anuwakabubuyemi lakai-vagaina.

[†] 2:4 Gal 1:10 [†] 2:4 Sam 17:3 [†] 2:6 Iyo 5:41,44

9 Tubuiyameyavo, wana nuwaududuna wa yama vediwe afaifaisewa amimwatuguya. Yaubada yana valeya iwakana alulumamalena wagaimiya, aku yadayada ke bogi taumeyavo amaitaveyabina faina afaifaisewa e ada keke vita ana velemini.

10 Aku yama dewa faina ani imi amatoitavedama, kaduwe Yaubada anafaiweya amatoitavedama, ina yama dewa-nai imi tovetumagana wagaimiya iwaka-moena kadu tunutunugina, ada keke tamo gavana koyona ada faisewa.

11 Faina waalamanena seyana seyana wagaimiya adewa anafaiweya tama seyana natunavo giitaitaveyabidi.†

12 Tova moyaina aluluwageyemi, avon-avona asevatumu, kaduwe avonavona vagadonemi e ada Yaubada Banae iwaka-vagaina ani imi seyana seyana yawaimi gina itana ke ginavona, “Taidei natuku yana dewa iwaka-moena ani akulauboda anafaiweya,” Banae gidouwemi Tauna yana ehaveimeya ke yana iwakana mamalina wagaine.†

13 Ada kaduwe avesivesiule Yaubada wagaine, faina yana vona alulumamalena wanoganogalina ada nuwanuwami lakaina, faina waalamanena tainei vona-nai ani keke kaliva-mowa yadi vona aku velemoena ani Yaubada yana vona,† ina gifaifaisewa imi tovetumagana aseasemi wagaidiya ke yami vetumagana gikivetoyogidi. Tainei faina tova moyaina avesivesiuleyena.

† 2:11 1Kol 4:14 † 2:12 Fip 1:27 † 2:13 Gal 1:11-12

14 Tubuiyameyavo, aalamanena Yaubada yana vona gifaisewa aseasemiya, faina gavana giyegemona Yaubada yana ekalesiya Yudiya anafafaliya, badi Yeisu Keliso nodi iveseyana ani vita-dina inuwagadi anafaiweya, imi kaduwe iyegemona wagaimiya. Badi Yudiya anafafali wagaine ani uloulolo inuwagana taudiyavo yadi yoo meIsileli wagaidiya-deya, ada kaduwe imiyavo uloulolo anafaiweya wanuwagana taumiyavo yami yoo wagaidiya.†

15 Badi toveumagigi-dina tubuiyadiyavo ikiveuloulolonidi ani yada Kauveya Yeisu iluvealikana,† ada tuwai-moena Yaubada yana falofitayavo iluvealikadi,† ada kaduwe ime ivenegama. Vona velemoena Yaubada keke ida kivemwamwali, ada ide kaliva moyaida wagaideya ivenibaina.

16 Waitana, igaluvaluva ke ina awatama vaita valeya iwakana ime keke ana lumamale badi keke meIsileli wagaidiya e ada kibababala ina nuwaga. Taidei dewa-nai wagaine yadi koyona iluvefovefofodi. Aku bademowa Yaubada yana nuwakoyo lakaina giyegemona wagaidiya.

Paulo nuwanuwana meTesalonaika gina maduboda-vagiledi.

17 Aku imeyavo ani tova-nai iluwaviwavima ke tova maufona amiyadaka wagaimiya-deya,† keke yada nuwanuwa wagaidiya aku vovo wagaine kamiyadaka. E ada nuwama ase-vagaidi wagaimiya ada abalabalalava ke kaduwe anayewa-vagilema wagaimiya.

† 2:14 Gug 17:5 † 2:15 Gug 2:23 † 2:15 Mad 23:29-34, 5:12

† 2:17 Gug 17:5-10

18 Velemoena nuwanuwama lakaina kaduwe ana maduboda-vagilemi faina, avediwe vaita kaduwe adayewa-vagilema wagaimiya. Iya tauku gavaiyei tova gagaluvaluva ke gana yewaku, aku Seitani yama wai gisebodabodana.

19 Faina tova-nai yada Kauveya Yeisu Keliso aimo ginayewa-vagilena ada moyaida kana mididi matane, gavana ime ana nuwavetumagana faine? Gavana yama ebavemwamwala? Gava ebakivekaikaiwabu faine ana gakaikai? Ina imiyavo.[†] Imi Yeisu wagaine wamiyaveyalata faina, wa yama vemwamwala ana gakaikai. Faina imiyavo ani yama gugai guwana, vaita amakedukedu kaikaiwabuna anafaiweya.

20 Vona velemoena imiyavo yama ebakaikaiwabu ada yama ebavemwamwala.

3

1 Tubuiyameyavo, tova manamanawena keke nodi kada vemagigiitaita ada keke maita valeyami ada nogali faina, anuwanuwa lakaina faimiya. E ada avenuwadadana vaita Iyayeku ke Sailasi amaiselu anamiya Atenisi

2 aku tubuiyada Timoti aimilina gielai wagaimiya, banae ani Yaubada nodi ifaifaisewa ke Keliso anavaleya iwakana gilulumamalena. Banae aimilina wagaimiya ke gina kivetoyogimi ke gina kiveasevatumi yami vetumagana wagaidiya,

3 e ada uloulolo wanuwagadi taidei vita-dina wagaidiya, ani keke seyana gaito wagaimiya yana vetumagana gidasege ke gidayewa yana

[†] 2:19 Fip 4:1

dewa tuwaina wagaine. Faina imi taumiyavo bademowa waalamanena vaita Yaubada giawae-gena uloulolo gina yegemona ide tovetumagana wagaideya.†

⁴ Tuwaina ime aimo nodi kamiyamiya wagaine, amaduvonayena wagaimiya vaita kaliva nimadiya kada uloulolo, ada anafaiweya vele-moena giyegemona. Imi alaalamanimiyavo.†

⁵ Ada vita-dina wanuwigadi faina, ganuwanuwa lakaina faimiya. Ada keke akufaiweya gana vebodaboda faina keke gada alamane gavaiyamu yami miyami, e ada Timoti gaimili gielai wagaimiya ke yami vetumagana anavaleya gana nogalina. Ganuwamatauta kai Seitani gida aladibidibiyemi ke wadabeu, ada yama gugai wagaimiya guwana gida vegaitoma-kavokavovo.†

MeTesalonaika valeyadi Paulo ginogalina ada givemwamwala.

⁶ Aku Timoti bademowa giyewana wagaimiya ada valeyami iwakana gialiyena, vaita yami vetumagana wasevelavelalaina Keliso wagaine ada wa yami nuwakabubu kaliva walemelemedi. Ada kaduwe giifufuyema vaita tova moyaina wa yami vemwamwala nodi waduduma, ada ime nuwanuwama imi ana itami anafaiweya, imi kaduwe nuwanuwami ime wana itama.

⁷ E ada tubuiyameyavo, yama aseuloulolo ke amavita tulina tulina anuwanuwigadi, aku awatalatalaina-nai anogalina vaita imi aimoina

† 3:3 2Tim 3:12 † 3:4 Gug 14:22 † 3:5 Fip 2:16

wavetuvetumagana Keliso wagaine ayo au aseasema ivatu.

⁸ Ina yami vetumagana-nai gilemema ke yama nuwanuwa iveiwaka ada nuwama iabonu, faina wavetumagana velemonoena ke gaitoma iwakadi wagugugaiyedi yada Kauveya yana nuwanuwa anafaiweya.

⁹ Imi faimiya ani avemwamwala-mowa Yaubada matane, e ada gavaiyamu anavona vesiule Bana wagaine? Vona vesiule keke anafata. Yaubada yana dewa keke kanavona!

¹⁰ Yadayada ke bogi Yaubada wagaine aveola yewayewa vaita kaduwe nodi kada vemagigiitaita, e ada gavaiyamu yami vetumagana wagaine wavemaufu ani ana lememe ke yami vetumagana gina veinala.

¹¹ Ada aveoveola ke Yaubada Tamada Tauna kaduwe yada Kauveya Yeisu yama wai ina kivetuvetununa ke anaelai wagaimiya.

¹² Ada yada Kauveya aveoveolena ke yami nuwakabubu gina kikivetubugi-moena. Ada ime yama nuwakabubu faimiya gaiiwaiwana anafaiweya, kadu imi yami nuwakabubu gina aiwaiwana, e ada moyaimi wana venuwanuwakabubu ada kaduwe kaliva moyaidi wana nuwakabubuyedi.

¹³ E ada aseasemi gina kivetoyogidi† ke aimo tova-nai yada Kauveya Yeisu ginayewa-vagilena wa yana kaliva tabutabudiyavo nodi, ani imi kaduwe tabutabumiyavo ada keke tamo wa yami koyona Yaubada Tamada matane.†

† 3:13 Iyem 5:8 † 3:13 Fip 1:9-10

4

Dewa iwakana wagaine Yaubada kana kivemwamwalina.

¹ Siule tubuiyameyavo, kaduwe maita-moena ganavona wagaimiya. Tuwaina akivetuve-tunumi gavaiyamu wanadewa ayo Yaubada nuwana wana kivemwamwali faina, ada au taidei anafaiweya wadewadewa. E aku tova malinai Kauveya anayeganeya aveoveolemi ke avon-avagadonemi e ada taidei dewa-dina iwakadi wana luvefovefofona.

² Faina bademowa waalamanena veimeyadina Kauveya Yeisu givelema ani tainei imi avelemi.

³ Faina Yaubada yana nuwanuwa imi faimiya ani taidei anafaiweya. Nuwanuwana imiyavo yawai tabutabuna wagaine wana miyamiya.† Taidei faina gilubodami keke maita wana awaawaegemi vovo anaawaegakavokavovo wagaine.

⁴ Ada seyana seyana vovomi anaawaega anaawata faina anaalamana wana vaina, ke imi taumiyavo vovomi wana vemoimoinedi anafaiweya tabutabudi Yaubada matane, e ada yami nuwa digadigaga wana veimeyedi.†

⁵ Badi kaliva-dina keke Yaubada ida alamane ani tova moyaina taudiyavo iawaawaegedi ebanuwayaudi wagaidiya ada keke maita taudiyavo ida awaawatadi. Aku badi yadi dewanai keke imi wada mulimuliye.

† 4:3 Lom 6:19,22, 1Kol 1:30, 2Tes 2:13, 1Pi 1:15-16 † 4:4 1Kol 6:13,15

6 Ada keke gida luboda kaliva tubuiyana yana veimeya gina vegaitoma-kavokavovoye ke vavinena vovodi gina kiluvaluva, faina banae gaito gina koyona tainei anafaiweya ani Kauveya gina vematavulogina. Bademowa-deya taidei gaitoma-dina faidiya aifufuye-vagaimi ke avonamatawemi.

7 Faina Yaubada keke gida douweda e ada dewa bwanebwane nena wagaine kana awaawaege da. Au gidouweda ke dewa yegayegana wagaidiya kana awaege da e ada yawai tabutabuna kana miyamiyanena.†

8 Taidei faina, banae gaito taidei vewala-nai gi-awaegegena ani keke vaita kaliva-mowa yadi vewala gida awaegege aku Yaubada giawaegegena, Banae Aluwaluwana Tabutabuna givewalemi.

9 Aku venuwanuwakabubu tubuiyamiyavo Yaubada yana yoo wagaine faina, keke tamo vuvu ayo faine ana vetokilumi wagaimiya, faina bademowa-deya Yaubada givewalemi ke moyaimi wana venuwanuwakabubu.†

10 Ada vona vele moena imi bademowa wade-wadewa taidei anafaiweya tubuiyamiyavo tovetumagana Masedoniya anafafali matatabuna wagaidiya. E aku kaduwe ana vonavagadonemi ke yami nuwakabubu gina tubuga-mowa.

11 Gilubodana wana galuvaluva ke wanamiya kenuwana. Keke kaliva yadi faisewa wagaine wana kibodaboda, ada keke wanamiya-kavokavovo aku taumiyavo nimamiya wana faifaisewa yami miya anaiwakana faina,†

† 4:7 1Pi 1:15 † 4:9 Iyo 13:34 † 4:11 Efes 4:28

anafaiweya bademowa aifufuyemi.

¹² Taidei wagaine amifaiweya taumiyavo wana itaveyabimi, e ada keke kaliva wagaidiya wana tunutunuvala ayo ina velemini gavana wavemaufu wagaine. Ada badi gavega keke Yeisu yana tonono ani yami dewa ina itadi ke ina vemoimoinemi.

Yeisu yana yewa-vagila faina.

¹³ Aku tubuiyameyavo, nuwanuwama wana alamanena gavana velemono giyegemona badi gavega tovetumagana ialika wagaidiya, e ada keke wa yami mulolova wana miyami anafaiweya badi gavega yadi ebanuwavetumagana keke.

¹⁴ Ide kavetumagana vaita Yeisu gialika ke giyawa-vagila. Ada taidei faina kaduwe kavetumagana vaita Yeisu ginayewa anatoveya, badi gavega anatovetumagana bademowa ialika ani Yaubada gina siveyawadi ke gina aliyedi Yeisu nodi.[†]

¹⁵ Ida gavana Kauveya Tauna bademowa givonayena ani anafaiweya aifufuyemi, ina tova-nai Yeisu ginayewa-vagilena, ide gavega wayawaideyavo keke wai kananago. Nagona gavega ivetumagana aku ialika ani biyavo-dina wai ina nagona.[†]

¹⁶ Faina Kauveya Tauna wagabameya gina obuelai ada wa yana veimeya ginakova, kaduwe anelose aditonagona ginakova bonana lakaina ada Yaubada yana kaula ina yuvena.[†] Ada

[†] 4:14 1Kol 15:20 [†] 4:15 1Kol 15:51-52 [†] 4:16 Mad 24:31

badi Keliso nodi iveseyana aku alialikadiyavo ani ina maduyawa alikeya.†

17 Ada ide gavega wayawaideyavo kamiyamiya, ani ide nodi gina luvagauwida ke kanalaka buibui wagaidiya ada Banae nodi kana venuwaga mwatuguya. E ada Kauveya Yeisu nodi kanamiya-vagata.†

18 E ada taidei vona-nai wagaine imi seyana seyana wanavona asevatumi.

5

Kana kidewadewa Kauveya yana yewa-vagila faina.

1 Aku tubuiyameyavo, gavatoveya o kai gavatu-tuya Kauveya Yeisu yana yewa-vagila faina, keke tamo vuvu ayo faine ana vetokilumi wagaimiya, keke.

2 Faina imi taumiyavo bademowa waalamane-dewedewena vaita yadayada-nai wagaine Kauveya gina yewana ani anatova keke tamo gaito gida alamane,† aku vaita bogi wagaine tokiyafu gina yegemona anafaiweya.

3 Kaliva ina vonaga, “Fafali moyaina wagaidiya niwalova gimiyamiya, e ada keke kana aseuloulolo yawaida faidiya.” Taidei anafaiweya ina vonavona ani maduga-mowa agolaufofola lakaina gina yegemona badi wagaidiya. Anafaiweya vavine waifugadi keke ida alamane yadi tova venatuna, e ada inamiya-kavokavovo ani maduga-mowa ina vefaedi ke

† 4:16 1Kol 15:22-23 † 4:17 Iyo 12:26 † 5:2 Mad 24:36,42-44, Luk 12:39,40, 2Pi 3:10

adiuloulolo gina yegemona. Tainei anafaiweya uloulolo-nai lakai-moena gina yegemona kaliva wagaidiya, ada keke adifaiweya inaota.†

⁴ E aku tubuiyameyavo, imi Yeisu yana yoo ada keke yuyuvana wagaine wada miyami faina, Yeisu yana tova-nai wagaine aimo keke gina veyaulovogimi anafaiweya tokiyafu yuyuvaneya toni manawa giveyaulovogina.

⁵ Imi matatabumi malina anakalivayavo ke ya-dayada anakalivayavo. Ide keke bogi anabiyavo o kai yuyuvana anakalivayavo.

⁶ Tainei faina keke kana dauda anafaiweya badiyavo Yaubada keke ida alamane, aku kana itaita ada taudeyavo kana awatada.

⁷ Faina badi gavega toda ani bogi wagaine idaudau, ada gufa toyogina anatoyuga ani bogi wagaine iyuga kwavakwava.

⁸ Aku ide malina anakalivayavo faina, taudeyavo kana awatada.† Anafaiweya manawa anasebabala kana osedi gaviya wagaine, ide gilubodada yada vetumagana Yeisu wagaine kana kidonena ada kana nuwanuwakabubu. Ada kibababala ananuwavetumagana vaita gaviya anakedukedu anafaiweya kuluwa-deya kanasedi.†

⁹ Faina Yaubada keke gida venuwadadaneda ke yana nuwakoyo lakaina guwana kana nuwaga, aku aiyada givenuwadadaneda kibababala kana nuwagana yada Kauveya Yeisu Keliso wagaine.

¹⁰ Banae ide faideya gialika e ada gavatoveya

† 5:3 Luk 21:34-36 † 5:8 Efes 5:8-9 † 5:8 Efes 6:13-17

ginaelai, aga kai wayawaideyavo o kai alialikadeyavo† ani gina vagauleda ke Banae ide nodi kana miyamiya.

11 Tainei faina seyana seyana
wagaimiya wana awaasevatumi ke
wana vonavona kivetoyogimi, anafaiweya
bademowa wadewadewayena.†

Paulo yana vagadona anaebalauyabu.

12 Ada tubuiyameyavo, aveolemi vaita
amitonagonayavo Kauveya givenuwadadanedi
yana gugai igugugaiyena amimwatuguya
ani wana vemoimoinedi.† Biyavo-dina
iitaitaveyabimi ke ikivetuvetunugimi gavaiyamu
wada dewadewa Keliso yana nuwanuwa
anafaiweya.

13 Badi yadi gugai faina wa yami nuwakabubu
nodi wana vemoimoinedi velemonoena. Ada imi
taumiyavo kukuya wagaine wana miyamiya.

14 Tubuiyameyavo, anavona vagadonemi
toyogina vaita wana vonamatawedi badi
gavega faisewa idibusoyogena ani gilubodadi
ina idibumwaiga.† Badi iaseuloulolo
wana kiveasevatudi, kabekabebediyavo
wana lemedi, ada kaliva moyaidi wagaidiya
wana atuvefailimi.

15 Kai gaito tamo ginadewa koyona wagaimiya
aga keke kadu wana miwayaudi wagaine, aku
aiyada tova moyaina wana galuvaluva ke ga-
vana iwakana wana faifaisewadi, taumiyavo wa-
gaimiya kaduwe kaliva moyaidi wagaidiya.†

† 5:10 Lom 14:7-9 † 5:11 Iyud 1:20-21 † 5:12 Ibel 13:17

† 5:14 2Tes 3:6,11,15 † 5:15 1Pi 3:9

16-18 Imiyavo Yeisu Keliso nodi waveseyana, ada Yaubada nuwanuwana taidei anafaiweya wanadewa. Tova moyaina wana vemwamwala.† Tova tova wana veoveola Yaubada wagaine.† Ada kai tova iwakana o kai tova vitana, au Yaubada wagaine wana vesivesiule.†

19 Aluwaluwa Tabuna keke wana iwamunumunu.†

20 Kai gaito tamo falofisai gina awamogatalena vaita Yaubada wagaine-deya, keke wana vegaitoma-kavokavovoye

21 aku gaitoma moyaina wana venuwadadanena kai Yaubada wagaine-deya o kai keke. Kai velemonoena Yaubada wagaine-deya aga wana venogalena.†

22 Koyona tulina tulina matatabuna wana vedomobubusedi.

Paulo yana vonavetalakafoi.

23 Ee, ada Yaubada Banae Tokukuya ani Tauna yana aseniwalova gina velevelemi ke gina kivetabu matatabuyemi, e ada imi seseliyemiyavo Banae faine wana miyamiya. Kaduwe aveola ke aluwaluwami matatabuna, yami nuwanuwa matatabuna, ke vovomi matatabuna gina itaitaveyabidi e ada imi keke wa yami koyona, ada gina nauwena-deya yada Kauveya Yeisu Keliso gina yewaelai.

24 Banae gidouwemi ani gavana ginavona, gina gugaiyena. E ada taidei gaitoma-dina aifu-fuyedi ani gina gugaiyedi.

† 5:16-18 Fip 4:4 † 5:16-18 Luk 18:1-5 † 5:16-18 Efes 5:20

† 5:19 Efes 4:30 † 5:21 1Iyo 4:1

25 Tubuiyameyavo, ime faimeya wana veoveola.

26 Imi seyana seyana nodi wana venuwaga wagaine, wa yami nuwakabubu tubuiyamiyavo wana vesiuleyedi.

27 Kauveya anayeganeya gavonavagadonemi, tamo gaito wagaimiya leta taidei gida veyawana imi tubuiyameyavo moyaimi matamiya.

28 Yada Kauveya Yeisu Keliso yana nuwadogeya wana miyamiya.

Iyayeku Paulo, Sailasi, ke Timoti nodi

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2